




LA GRANDE DE CONFRARIE DES SOVLX

D'ouurer, & enragez de rien faire.
Auecques les pardons & statutz
dicelle. Ensemble les mōnoyes
dor & dargent seruans a ladi-
cte confrarie. Nouvelle
ment imprimee.



1 5 3 7

On les vend a Lyon, chez Frācois Iuste,
deuant nostre Dame de Confort.

LA GRANDE
DE CONFRARIE DES SOUV.



On les vend a Lyon chez Etrois
deum nostre Dame de Carlon

Indulgences & pardons de la con-
frarie de monseigneur mon-
sieur saint Laf-
che.



DE P A R Saoul dou-
urer Par la grace de
trop dormir, roy de ne-
gligēce, duc doysue-
te, palatin dēfance, vis-
conte de meschancete,
marquis de trop muser
conneftable de nulle
entreprinse, Admiral de faintise, cappitaine
de laiffe moy en paix, garde & gouverneur
de tous ceux & celles q aimēt besongne fai-
cte & du tout acheuee. Et seigneur de rien
faire, escuyer & courrier de la court ordi-
naire de monseigneur monsieur saint Laf-
che. A noz amez feaulx les generaulx &
conseilliers sur le faict de nulle science. A
noz tresoriers & argentiers sus le faict de
nulle fināce, qui sont noz aydes, & a noz
maistres de plusieurs affaires, A nostre bail-
lif Salut. Sās dilaciō & nul cōfort nous auōs
entendu par bōne & souffisante complain-
cte de noz bien amez & alliez les gens de

nostre abbaye de chasse prouffit. Si comme
sõt pouures souffreteulx endebtez malheu
reux, mal fortunez, miseraulx, quereleux,
necessiteux, racheptz, & teigneux, vuides
de richesses & indigēs de tous biēs priuez,
& de tout en tout despouillez que sur pei
ne de cinq marcs destouppes destre bouil
liz en brē & brulez en la riuiere vous ayez
a tenir les ordonnances qui sensuyent de
par nostre tresreuerend pere en dieu & in
discricte personne. P O N T S maudine
nostre prelat es leu par les conscilliers de
nostre abbaye de chasse prouffit, que com
bien tant pour eulx que pour leurs prede
cesseurs dont ilz ont cause, ayent este sont
& seront encores & demoureront se dieu
plaist en bonne say sine & vraye possession
de non rien auoyr, & de tousiours moins ac
querir pour nous ny pour autres en aulcu
ne maniere & de faire tousiours grādes deb
tes, & pour iceulx debtes estre tousiours
emprisonnez, gaigez, excommuniez plus
souuēt q̄ vng chascun iour. Et si par aucun
cas daccident ou de fortune il leur aduiēne
aucun peu de rente ou quelq̄ bonne & val
lable possession (que ia dieu ne playse) ilz
en doibuent ordonner & disposer en ceste

maniere q̄ sensuyt. Cest assauoir quilz lay f-
sent leurs maisons cheoir a terre &, mectre
en ruine, affin q̄ ne pleuue dessus aussi par
eulx chauffer du bois de la couuerture di-
celle maison silz sont gens qui puissent en-
durer le feu.

Item quilz laissent leurs terres & heritages
sans les labourer ne rien y semer, pour la
doubte des oyseaulx, lesquels māgent les
semēces & les fruietz quād ilz sont meurs,
& apres laissent venir leurs prez en ruynes,
espines, & huissons: affin que les Regnars,
Lieures, Lappins, cerfz, biches, porcs san-
gliers, & autres bestes sauluaiges puissent
habiter ausdictz prez & faire leurs re-
traictz, & les oyseaulx y faire pareillemēt
leurs nidz si mestier est. En oultre laissent
leurs vignes venir en herbes & desers
pour obuier & resister aux grādes peines,
labeurs millions & despens qu'il conuient
faire & mettre vng chascun an pour les la-
bourer & fessorer.

Item plus laissent leurs boys couper, rom-
pre, tailler, & destruire, pour causes des be-
stes sauluaiges & des larrons, qui en cause
de neccessite y pourroient faire leurs re-
traictz, affin de eulx se mussier & cacher.

Item quilz laissent rompre & creuer leurs
estāgs pour cause q̄ les poysfōs & autres be
stes cōe escreniffes, raues, chaboulx, q̄ sont
de dās: qlz puiffēt estre hors de prison & sef
batre p̄my les chāps, & chāger vn peu daer.
Item leurs moulins laissent cheoir & tom
ber en ruyne pour cause de la farine q̄ gaste
les robes des hōnes gens q̄ y viennēt mou
dre: Et pource, & a cause que nous gardons
& maintenons en nostre dicte abbaye de
Chasse prouffit, fine franchise, follastrerie
Chasteau tout y fault, que iamais ne mourra
sans heretiers, & de leurs autres biēs, rêtes,
& reuenuz que ia nauienne se dieu plaist
aucun bien ny proffit. Aucuns noz autres
iusticiers & subiectz si comme sont escer
uelez, folz, fr enetiques, oultreuidez, cor
nars, musars, teigneux, plains de vernime,
& autres bauars sans raison, ne bort, ne mai
son, renuerseurs de tasses, vuideurs de coup
pes, blanchisseurs de beurre, taincturiers
de nappes, rotisseurs de trippes, escumeurs
de potz, viieurs de rost, tireurs de chair du
pot, trois heures auant quelle soit cuycte:
Regardeurs & gardeurs de gaiges en plu
sieurs lieux par deffault de plus souffisant
quand ilz ont a besoingner avec leurs

heraulx, si cōme sont lanterniers, buffatiērs
crieurs de vin a vendre, ruffiās, orliers, bour
deurs, yurays, gourmans, truians, porteurs
dymages, baſteleurs, trompeurs, barateurs,
& coquilleurs. Leſquelz ſe ſont parforcez
& vng chaſcun iour ſe parforcent d'entrer
en noſtre grād & terrible royaulme de ver
te biſe & frappe vent. Et veullent ediffier
maifons & herbergement qui ſont deſolez
Et de long temps deſtruyz. Nous les ſou
haitōns, deſirons, & voulons garder en tel
eſtat bien longuement, Et qui pis eſt ilz de
laiſſent daler par les bōnes villes de noſtre
royaulme & autres lieux, a cauſe du grand
argent qu'on leur doiſt, & quilz doyent.
Pareillement affin de trouuer tauernes &
cabaretz pour paſſer leur temps & augmē
ter leurs honneurs en ſoubtenant ladictē ab
baye & couſtume de monsieur Sainct Laſ
che car ilz ne veulent prendre aduentaige
ſur perſonne quelcōque, ſi dauenture il ne
le peuuent rrouuer, car ilz ne ſe rompent
pas les iambes a les chercher. Et en retour
nant deſdictes tauernes & cabaretz ont ac
couſtume de ſe battre & dōner les vngs aux
autres grans tatins & horions, gros & me
nus, leſquelz horions par faulte deſpaze


se dōnent avec grosses pierres & gros tron
sons de boys, & qui pis est payent deniers
brulez, liards effacez, karolus, soulz, & te
stons qui ne se mettent en pain, en vin, en
chair, ny poysson. Et en partant desdictes ta
uernies en cōtant a leurs hostes & hostesses,
leurs baillēt a garder par faulte d'argent ro
bes, manteaulx, cappes, sayons, chausses, &
pourpointz & autres habilemens si dauan
ture ilz ont grandes estaches de chiēs, gros
ses pierres blanches & noyres, saphiz iaul
nes, dyamās noyrs, & perles rouges, & plu
sieurs autres pierres pretieuses: lesquelles
dōnēt en gaige & a garder soubz les deux
yeulx de la teste iusqs a tēps qlz ayēt loisir
de les payer, au grād preiudice & dōmaige
desdictz cōplaignans en les perturbās atort
& adroit, & sans cause & raison deue. Et de
nouueau en venant contre les priuileges de
nostre abbaye de Chasse prouffit, requerās
sur ce prouision de iustice. Parquoy nous
ces choses considerees & auoyr ouy par
lesdictz complaignans, Nous vous mādōs
& cōmandons que Royallēmēt & de faict
vous les maintenez & gardez en vraye fai
sine & possession, dauoir tous les dimen
ches deux miches de faulte, le lundī faulte

de vin, le mardi, mecredi, & ieudi neccessi-
te chair. Le vendredi & samedi comme les
autres iours, & de nen riẽ auoir en tout tẽps
fors seulement toute leur vie pouurete &
misere. Et en cas doppositiõ non suffisante,
attendu que lesdictz complaignans ne sont
tenuz si ne leur plaist de proceder ailleurs
fors en nostredicte abbaye de Chasse prouf-
fit, vous leurs donnerez & assignerez iour
non competant par deuant lung de noz iu-
ges, ou pardeuant son liutenant pour les re-
culler de bien en mal, & proceder de mal
en pis & de pis en pis, & encore oultre pis,
sans occasion ne ryme ne raison: Car ainsi
le voulõs, & ausdictz complaignãs lauõs
octroye & octroiõs p ces p̄sẽtes. Lãde grace
especialle aux lãbarnieres troys iours apres
iamais en nostre ville de Meschãce, apres
nostre cite de Malaise. Sellenz de noz pe-
titz seaulx par deffault de nostre grãd seau
(q est chez loffeure engagee pour la fassõ,)
Et signees par les maistres des souffreteux
a la relatiõ des endormiz. Tesmoigs Jehan
gueneau Thibaud lenfle Et Guillaume
maul souppe, a ce requis sans appeller. Et
signees par nous autres notaires cy soubx
nommez. Des vignes Des blez

CHOSSES MERVEILLES

ses & de grandes indulgeuces de
ladiçte confrarie de Monsei-
gneur mōsieur sainct

Lasche.



A CHVS, Cupido,
Ceres, Pallas, & Ve-
nus regēs & regentes
des priuileges & ordi-
naires de la confrarie
de nostre tresreuerēd
pere en dieu monsei-
gneur mōsieur sainct

Lasche salut. Veū & cōsidere q̄ selō les me-
rites de ce mōde on est remunerē en lautre.
Nous ayans esgard & respect a noz amez
& feaulx seruiteurs & seruantes de nostre
abbaye de monsieur sainct Lasche, faisons
assauoir a vng chascun & chacune q̄ pour
la remuneratiō du biē & de lhonneur qui
se font parforcez en ce monde a lhonneur
de nostredict prelat eux trepassez de ce mō-
de en lautre, auons trouue vne isle assise en
vng lieu delectable, ou a tout iamais pour-
rōt demourer en ioye & felicite, sans auoir
pensēment quelconque, cōme vng chacun

pourra puis apres ouyr & entendre. Car
au milieu de ladicte isle ya vng chasteau tel
lement construict & edifie, que cest vng cas
incredible, sinon a ceulx qui lont veu &
biē regarde. Car les murailles dudict cha
steau sont toutes faictes avec gras froma
ges de Milā toutes en poinctes de diamās,
& ont telle propriete que tant plus on en
oste, & tant plus en reuient. Les creneaulx
& fenestrages sont descalletes, avec vne ma
niere de mortier faict avec beurre fraiz, fro
maige, & force sucre. Les pōtz leuis sont
panez avec force casse museaulx, les chais
nes a leuer lesditz pontz leuis sont faictes
dandouylles & de gras boudins farciz &
roustiz tous pres a manger & grignotter.
A lun des costez dudict chasteau a main es
carre sont situez palais, chambres, & salles,
tous pauez de pierres pretieuses, cōe iacin
tes, rubis, esmeraudes, escarboucles, perles
turquoyes, & gros dyamans qui est vne
chose fort magnifique. Et sont lesdictes
chambres toutes voultees de petitz pastez,
les lictz sont de plume de Fenix, & les cha
litz de fin yuoire, ouurez & taillez a plai
sir, les courtines de fin drap dor faictes en
broderie triumphante, Les cuissinetz de

v elours cramoyfi, tellement que quand on
a dormy dix ans il ne monte pas dix heures.
Les tables, treteaulx, & scabelles sont fai-
ctes de bois Daloyz, de Sādix, & de Chip-
pres, qui rendēt vne odeur si suauē & si ma-
nificque que a bien cōsiderer cest vne cho-
se deificque. Les nappes & seruiettes sont
faictes en taffetas blāc, les platz escudelles
& toutes aultres vaisselles sont faictes des-
carboucles taillees & deuisees en toutes sor-
tes & manieres quon scauroyt demander.
Tellement que quand voulez asseoir a ta-
ble vous n'auēz sinon a demander telles viā-
des que voulez, que les auez incontinant
toutes taillees & prestes a manger. Et si ne
voulez prendre la peine a les tailler, vous
n'auēz sinon haïfler q̄ les morceaulx faultēt
incontinant en vostre bouche Et au sortir
desdictes tables, vous auez toutes manie-
res dinstrumens, comme orgues, tabourins,
rebecz, auboyz, trompettes, luctz, psarte-
rions, clairons, & manicordions. Lesquelz
sont de si melodieux accord que vng an ne
deure pas vng iour. Or quād au coste droict
vous auez les iardins de plaïssance, ou ya
toutes manieres de fleurs quon scauroyt de-
mander. Vng peu plus auant vous trouue-

rez vne vallee en laquelle ya plusieurs belles fontaines qui rendent vin blanc, vin claret, vin cuit, vin grec, yppocras, maluelie, & fin muscat. Vng peu plus auant ya vng petit verdier auquel tombe quand on veult de gresle qui n'est sinon toutes manieres de dragées comme camellat graugeat, giroffiat madrians, anis, coriandres, dragee, musquee que toutes autres couleurs. Et est ledit verdier tout ferme & environne darbres qui portent faisans, gellines, perdriz, cōnis, bec casses, chappons, & espaules de mouston toutes rosties & prestes a māger. Et en montant vng peu plus hault vous trouuez vne montaigne si haulte que quand vous estes au dessus vous pouez toucher au ciel, si y voulez toucher: Et porte ladicte mōtaigne vne sorte darbres qui portent toutes manieres dhabillemens, comme robes, cappes, manteaulx, gonnelles, manchons, chapeurons, & quād les voulez auoir vous nauez sinon a parer les espaules que incontnent faultent dessus. Pourquoy vng chascun se pourra parforcer de maintenir obeyr & seruir aux cōmandemens de monseigneur monsieur sainct Lasche, pour paruenir a la felicite des choses susdictes:

Item & pour la grande multitude de nos-
dictes terres & seigneuries il ya plusieurs
gens qui bien souuant sont necessiteux &
ont affaire dor & dargent & ne scauent que
vallent plusieurs pieces dor & dargent . Et
a cause quilz nen ont point & nen manient
gueres & si en vouldroient beaucoup auoir
mais aucunesfois il fait si grand froyd quilz
ne scauroient tirer vng escu de leur bourse.
A celle fin nous y voulons pouruoir & re-
medier & mettre pris raisonnable selon la
valeur de lor & monoye de nostredicte ab-
baye. Donne en nostredict couuant de mau-
gouerne. Lan du monde six mille six cens
& six & le trentesixiesme du moys passe,
signe par le grant conseil & par nostredict
chancellor.

Raguin peintre des rouges museaux

Sensuit la valeur & pris de
lor & mōnoye de
nostredicte
abbaye.

Premierement lor.

- Vn noble vault deux villains
- Vn ducat deux contes
- Vn angelot deux cherubins
- Vn mouton deux brebiz
- Vn real deux cheualiers
- Vn Lion deux Leopars
- Vn Salut deux bonadies
- Vn escu deux targes
- Vn ridde deux vieillars
- Vn guillermus de ux ioannes
- Vn franc deux serfz
- Vn franc a pie deux a cheual
- Vn pietre deux gerars
- Vn ioannes deux magisters
- Vn florin au monde deux de Paradis
- Vn florin au chat deux ratz
- Vn potestat deux requestes
- Vn florin de bauiere deux de gorgery
- Vne targe deux paruis
- Vn marquis deux barons
- Vn appetit deux cibotz
- Vn ail deux oignons

La valeur de l'argent

- Vn tetard deux estourdz
- Vne grosse teste deux menues
- Vn grand blanc deux petiz
- Vn floret deux roses
- Vn double deux fangles
- Vn breton deux anglois
- Vn hardy deux couars
- Vn tournois deux ioustes
- Vne vache deux veaux
- Vne haye deux buissons
- Vne plaque deux flamans
- Vn blanc deux noirs
- Vn gros deux menuz
- Vn liart deux grifons
- Vn gigot deux espaules
- Vn car de Sauoye deux charrettes
- Vn fort deux foibles
- Vne maille deux cordes

Passé par le grand conseil
de nostre abbaye, &
signé par.

M. Guoguelu le mousterdier.